



# **El ei vegnius tentaus dil satan ed ils aunghels survevan ad el**

Plaid pastoral per l'emprema dumengia  
da Cureisma 2024

Joseph Maria Bonnemain,  
uestg da Cuera

**Avis per ils texts liturgics :**

**Lecziuns da l'emprema dumengia da Cureisma, onn B**

1. Lecziun: Gen 9,8-15

2. Lecziun: 1 Pd 3,18-22

Evangelii: Mc 1,12-15

*Quei plaid pastoral sa vegnir prelegius ni miraus sco messadi da video en tuts survetschs divins l'emprema dumengia da Cureisma, ils 18 da fevrer 2024.*

*Per mintga dumengia dil temps da Cureisma vegn tarmess tier ad uras a mintga pleiv in plaid pastoral corrispudent cun il messadi da video.*

*Ils messadis pastorals vegnan mintagmai gliendisdis suenter mintga dumengia da Cureisma dai liber.*

Cars fargliuns dalla famiglia humana,  
caras soras, cars frars

Vus essas probablamein surstai che jeu plidentel Vus  
aschia. Jeu vi cheutras exprimer quei che nus numnein  
evangeli, pia buna nova. Quei ei il motiv che jeu sun  
sedecidius per quei tetel.

La tentaziun che stat all'entschatta dalla historia humana  
ei da principi la medema sco quella ella quala satan ha  
empruau da menar Jesus el desiart. Ella consista en la  
disfidonza enviers Diu ed ils carstgauns. Ella consista en  
quei da veser nos concarstgauns sco inimitgs, sco jasters,  
sco mulesta, sco prighel, sco rivals. Quei ei buca stada  
l'intenziun da Diu tier la scaffiziun dil mund. El ha buca  
vuliu e vul era oz buca l'inimicezia denter nus carstgauns  
ed era buca denter la natira ed ils carstgauns.

Cun la veta, la mort e la levada da Jesus ei il project  
original da Diu per la carstgaunadad e per il mund puspei  
vegnius restabilius. Duront il temps da Cureisma  
sepreparein nus da prender danovamain a cor quella  
nuviala e da confirmar ella tras plaid ed ovras.

Igl evangeli da Diu che Jesus annunzia, igl evangeli el  
qual nus astgein crer, ei fetg sempels: «Il reginavel da  
Diu ei damaneivel!» Nus essan clamai da crer e  
d'annunziar che tut quei che Dieus ha scaffiu ei tras e tras

bien. Nus duessan sedistaccar da tuttas imaginaziuns da rivalitad, separaziun, uiara e cumbat denter carstgauns, pievels e naziuns. Dalla tendenza nuscheivla da vuler ereger barrieras, cunfins e mirs stuein nus sevolver naven vi tier ina fraternitad globala. Nus essan tuts – senza excepziun – affons dil medem Diu. Igl artg sco segn dalla ligia eterna denter tschiel e tiara, denter Diu e la carstgaunadad vegn buc a sblihir. Sco cristianas e cristians essan nus ambassaduras ed ambasadurs da quella fidonza nunsuperabla. « Il temps ei secumplenius.» Dieus ei damaneivel. El stat adina cun nus: sut tuttas circumstanzas, perfin las pli nunpusseivlas. Entras sesurdar sesez daventa Cristus l’arca spindronta dalla nova ligia, ella quala ei ha plaz per l’entira carstgaunadad. Lein pia seconverter e crer egl evangeli! Lein entras nossa veta esser evangeli per nies mund. Unius ell’oraziun culs megliers auguris salidel jeu Vus cordialmein.

+ *Joseph Maria*

Joseph Maria Bonnemain  
uestg da Cuera